



Sumáriu Kazu
Tribunál Distritál Baucau
Edisaun Marsu 2017

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 30

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	14
Artigu 258 (KP)	Danu simples	4
Artigu 154 (KP)	Maus tratus ba kónjuje	3
Artigu 145(KP)	Ofensa ba integridade fízika simples	1
Artigu 258 (KP)no artigu 157 (KP)	Danu simples no ameasa	1
Artigu 259 (KP)	Danu agravadu	1
Artigu 145 (KP)no	Ofensa ba integridade fízika	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

artigu 157 (KP)	simples no ameasa	
Artigu 177 (KP)	Abuzu seksuál ba menér	1
Artigu 157 (KP)	Ameasa	1
Artigu 296 (KP)	Pekulatu ho uzu	1
Artigu 23(KP) artigu 139 (KP) no artigu 35 letra (b) Lei Kontra Violénsia Doméstika (LKVD)	Tentatifa no omsidiu agravadu ho natureza violénsia doméstika no tipu ilísitu sira kona-ba violénsia doméstika	1
Artigu 172(KP)no 173(KP)	Violasaun seksuál ho agravasaun	1
Totál		30

2. Totál desizaun ne'ebé JSMP monitoriza: 26

Tipu desizaun	Númeru
Suspensaun ba prizaun nia ezekusaun artigu 68 Kódigu Penál	8
Pena multa tuir artigu 67 hosi Kódigu Penál	7
Omologa dezisténcia keixa	6
Pena prizaun	2
Suspensaun ba prizaun nia ezekusaun artigu 68 Kódigu Penál ho regra ba konduta artigu 70 letra g	2
Suspensaun ba prizaun nia ezekusaun artigu 68 Kódigu Penál no indemnizasaun Sivil	1
Totál	26

3. Total kazu sira ne'ebé adia tuir JSMP nia monitorizasaun : 2

Razaun adiamentu	Númeru
------------------	--------

Prokuradór tuir enkontru iha Dili	2
Totál	2

4. Totál kazu ne'ebé sei kontinua prosesu tuir JSMP nia monitorizasaun : 2

Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fizika simples ho natureza violénsia doméstika

Nú. Prosesu : 0029/16. VQSIC
 Kompozisaun Tribunál : Singulár
 Juis : Dr. Afonso Carmona
 Prokuradór : Dra. Bemvinda do Rosario
 Defeza : Dr. Sidonio M. Sarmento (Defensória Pública)
 Tipu pena : Pena prizaun fulan 6 suspende ba tinan 1

Iha 02 Marsu 2017 Tribunál Distrital Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu SS hasoru nia feen, iha Distritu Viqueque.

Akuzasaun husi Prokuradór

Prokuradór akuza katak iha 1 Outubru 2016, iha tuku 15.30 lokraik, arguidu basa dala 1 iha lezada nia kanuruk, lori nia-ain fai lezada nia-kabun no uza liman sikun fai dala 1 ba lezada nia kotuk sorin loos. Aktu ne'e rezulta lezada ba halo tratamentu iha Centru Saúde Viqueque.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu hili direitu nonok, iha parte seluk lezada kontinua konfirma faktus sira iha akuzasaun. Maibé lezada mós deklara tan katak arguidu foin primeira- vez baku lezada no liu loron 4 sira diak malu fali.

Alegasaun finál

Prokuradór haktuir katak mezmú arguidu hili direitu nonok, maibé lezada kontinua konfirma faktus sira iha akuzasaun. Tanba ne'e husu ba Tribunál aplika pena prizaun tinan 1 suspende ba tinan 2.

Enkuantu Defeza haktuir katak iha audénsia arguidu hili direitu nonok no lezada mós deklara katak arguidu foin primeira-vez baku lezada no sira diak malu ona. Tanba ne'e husu ba Tribunál aplika pena ne'ebé adekuadu ba arguidu.

Desizaun

Depoizde avalia faktus provadu sira ne'ebé produz durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu mós kustu judisial US\$20.00.

2. Krime ofensa ba integridade fizika simples ho natureza violénsia doméstika

Nú. Prosesu : 0032/16. BCBCV
Kompozisaun Tribunál : Singulár
Juis : Dr. Jose Quintao
Prokuradór : Dra. Bemvinda do Rosario
Defeza : Dr. Sidonio M. Sarmiento
Tipu pena : Pena multa US\$15.00

Iha 02 Marsu 2017 Tribunál Distrital Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu LdSX hasoru nia feen, iha Distritu Baucau.

Akuzasaun husi Prokuradór

Prokuradór akuza katak iha 30 Maiu 2016, iha tuku 10.00 dadersan, sein motivu ne'ebé klaru arguidu hit sae lezada nia ain no riba lezada ba rai. Aktu ne'e rezulta lezada nia ulun kona iha rai no lezada dezmaia.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu deklara katak wainhira arguidu fila husi Dili rona lezada hela iha kos, tanba ne'e arguidu ba buka tuir no arguidu konsege hetan lezada, no lori fila lezada ba uma. Wainhira to'o iha uma arguidu ho lezada diskute malu no lezada foti roupa atu fila fali ba kos maibe arguidu tahan netik lezada no lezada dada arguidu nia faru gola no rezulta lezada ho arguidu monu ba rai. Iha parte seluk lezada deklara katak monu duni maibé la dezmaia tanba ne'e lezada ba hato'o keixa iha polisia no kontinua ba Ōspital Referal Baucau.

Testemuña MC nu'udar viziñu depoimenta katak arguidu ho lezada diskute malu, no testemuña mak ba sori netik no haree lezada tebe arguidu, tanba ne'e arguidu kaer lezada nia ain kauza lezada monu ba rai.

Alegasaun finál

Prokuradór mantein nia akuzasaun no husu ba Tribunál atu kondena arguidu ho pena prizaun tinan 1 suspende ba tinan 2 nu'udar prevensaun ida ba arguidu atu la-repete ninia hahalok ne'e iha futuru.

Enkuantu Defeza haktuir katak Tribunál bele konsidera arguidu nia konfiksaun iha audénsia julgamentu ne'ebé reforsa mós husi testemuña nia depoimentu. Tanba ne'e husu ba Tribunál aplika pena ne'ebé adekuadu ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$15.00 no sei selu 0.50 sentavus kada loron durante loron 30. Tribunál mós fiksa pena alternativa durante loron 20 wainhira arguidu la kumpri pena multa ne'e.

3. Krime ofensa ba integridade fizika simples ho natureza violénsia doméstika

Nú. Prosesu : 0040/16. MNMNT
Kompozisaun Tribunál : Singulár
Juis : Dra. Ercilia de Jesus
Prokuradór : Dr. Alfonso Lopez
Defeza : Dr. Grigorio de Lima (Defensória Pública)
Tipu pena : Pena prizaun fulan 3 suspende ba tinan 1 ba arguidu no arguida

Iha 6 Marsu 2017 Tribunál Distritál Baucau liuhosi Tribunál movel iha Distritu Manatuto prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida CdC (feen primeiru) no arguidu LAP hasoru feen segundu, iha Distritu Manatuto.

Akuzasaun husi Prokuradór

Prokuradór akuza katak iha 26 Agostu 2016, iha tuku 07.00 dadersan, arguida CdC kamat dala 2 iha lezada nia oin no basa dala 1 iha lezada nia hasan, arguidu LAP foti ai-sanak baku dala 1 iha lezada nia tilun no rezulta kanek no ran.

Prokuradór akuza arguidu no arguida kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu/a konfesa faktus hotu iha akuzasaun, arguidu/a deklara mós katak foin primeira-vez mai hatan iha Tribunál no arepende ona sira nia hahalok. Iha parte seluk lezada kontinua konfirma faktus sira iha akuzasaun depoisde akontesementu ne'e too agora hela hamutuk nafatin iha uma ida no la hirus malu.

Alegasaun finál

Prokuradór haktuir katak arguidu/a konfesa faktus hotu iha akuzasaun, foin primeira-vez mai hatan iha Tribunál, arrepende ona sira nia hahalok. Tanba ne'e husu ba Tribunál aplika pena prizaun ho ezekusaun suspensaun.

Enkuantu Defeza mós subliña tan katak arguidu/a sira konfesa faktus hotu iha akuzasaun, arrepende ona sira nia hahalok no foin primeira-vez mai hatan iha Tribunál arguidu/a ho inisiativa rasik diak malu fali ho lezada. Tanba ne'e husu ba Tribunál aplika pena ne'ebé adekua ba arguidu/a.

Desizaun

Depoisde avalia faktus provadu sira ne'ebé produs durante julgamentu, Tribunál konklui katak arguidu/a provadu komete krime hasoru lezada. Tanba ne'e Tribunál kondena arguidu no arguida ho pena prizaun fulan 3 suspende ba tinan 1 no selu mós kustu judisiál US\$50.00.

4. Krime ofensa ba integridade fizika simples

Nú. Prosesu	: 0598/12.PDBAU
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Alfonso Lopez
Defeza	: Dr. Grigorio de Lima
Tipu pena	: Omologa pedidu dezisténsia keixa

Iha 6 Marsu 2017, Tribunál Distritál Baucau liu husi Tribunál movél iha Distritu Manatuto prezide julgamentu tentativa konsiliaun ba krime ofensa ba integridade fizika simples ne'ebé envolve arguidu AdSS hasoru lezadu FSD, iha Distritu Manatuto.

Akuzasaun husi Prokuradór

Prokuradór akuza katak iha 3 Novembru 2012, iha tuku 09.25 dadersan, iha Aldeia Belebatu, Suku Ma'abat, sein motivu ne'ebé klaru arguidu lori fatuk tuda lezadu no kona iha lezadu nia liman kabun parte loos.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa.

Tentativa konsiliaun

Antes tama ba produsaun provas, bazeia ba artigu 262 KP kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu husu diskulpa ba lezadu tanba entre arguidu no lezadu sei iha relasaun familia no sei ho idade joven hela. Tanba ne'e lezadu husu ba Tribunál atu deziste nia-keixa hasoru arguidu.

Prokuradór no Defeza apresia akordu dame ne'ebé parte rua deside ona no husu ba Tribunál omologa prosesu ne'e.

Desizaun

Bazeia ba pedidu dezisténsia hosi lezadu, Tribunál konklui prosesu ne'e no omologa akordu ne'e.

5. Krime danu simples no ameasa

Nú. Prosesu : 0009/14. BCVMS
Kompozisaun Tribunál : Singulár
Juis : Dra. Ercilia de Jesus
Prokuradór : Dr. Alfonso Lopez
Defeza : Dr. Grigorio de Lima
Tipu pena : Omologa pedidu dezisténsia keixa

Iha 7 Marsu 2017 Tribunál Distritál Baucau liu husi Tribunál movél iha Distritu Manatuto prezide julgamentu tentativa konsiliaisaun ba krime danu simples no krime ameasa ne'ebé envolve arguidu FdS hasoru lezadu AG, iha Sub-distritu Vemasse, Distritu Baucau.

Akuzasaun husi Prokuradór

Prokuradór akuza katak iha 6 Setembru 2014, iha tuku 09.00 dadersan, arguidu ba lezadu nia restaurante sorin no tolok no amiasa katak "*hau tun ba sona mate hotu imi nain rua*" no lezadu haree katak arguidu sikat hela duni tudik iha arguidu nia kanotak. Hafoin lezadu hakbesik ba arguidu no husu ajuda ba Sr. Agus foti sai tiha tudik husi arguidu nia kanotak. Tanba ne'e arguidu hirus tama ba restaurante laran estraga lezadu nia lampu neon 4. Kada lampu ida ho folin US\$2.50 total US\$10.00, kuluna bo'ot 2 ho folin US\$60.00, laptop ho folin US\$500.00, odamatan ho folin US\$10.00, sana bo'ot 1 folin US\$10.00 no hahan sira fa'an iha restaurante laran US\$50.00. Total prejuízu ne'e hamutuk US\$640.00. Depoisde estraga tiha sasan sira ne'e arguidu nafatin dehan ba lezadu katak sei oho lezadu ho nia feen no nia oan sira.

Prokuradór akuza arguidu kontra artigu 258 Kódigu Penál kona-ba krime danu simples ho moldura penal too tinan 3 ka multa no artitgu 157 Kódigu Penál kona-ba krime ameasa ho moldura penal too tinan 2 ka multa.

Produsaun ba prova

Antes tama ba produsaun ba provas, bazeia ba artigu 262 Kódigu Prosesu Penál kona-ba tentativa ba konsiliaisaun, juis husu atu halo tentativa konsiliaisaun ba arguidu no lezadu.

Iha prosesu konsiliaisaun ne'e, arguidu husu diskulpa ba lezadu tanba entre arguidu no lezadu sei iha relasaun família. Tanba ne'e lezadu husu ba Tribunál atu deziste nia keixa hasoru arguidu. Lezadu mós la husu indemnizasaun ba sasan ne'ebé arguidu estraga tanba entre lezadu no arguidu sei iha relasaun familia. Lezadu so husu deit ba Tribunál halo akta ida atu iha futuru arguidu la bele repete tan krime hanesan hasoru lezadu..

Prokuradór no Defeza apresia akordu dame no pedidu dezitensia hosi parte sira, nune'e husu ba Tribunál omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui no omologa akordu ne'e.

6. Krime ofensa ba integridade fizika simples ho natureza violénsia doméstika

Nú. Prosesu : 0007/16. MNLLA
Kompozisaun Tribunál : Singulár
Juis : Dra. Ercilia de Jesus
Prokuradór : Dr. Luis H. Rangel da Cruz
Defeza : Dr. Grigorio de Lima
Tipu pena : Pena prizaun fulan 5 suspende ba tinan 1

Iha 8 Marsu 2017, Tribunál Distritál Baucau liuhosi Tribunál movél iha Distritu Manatuto prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdC hasoru nia feen, iha Distritu Manatuto.

Akuzasaun husi Prokuradór

Prokuradór akuza katak iha 20 Jullu 2016, iha tuku 08.00 dadersan, arguidu tebe dala 3 iha lezada nia kanotak parte loos.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun prova

Iha julgamentu, arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Iha parte seluk lezada kontinua konfirma faktus sira iha akuzasaun.

Alegasaun finál

Prokuradór haktuir katak arguidu konfesa faktus hotu iha akuzasaun, arrepende ona nia hahalok, tanba ne'e husu ba Tribunál aplika pena prizaun fulan 4 suspende ba tinan 1.

Enkuantu Defeza mós subliña liutan katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekua ba arguidu.

Desizaun

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 5 suspende ba tinan 1 no selu mós kustu judisial US\$10.00.

7. Krime danu agravadu

Nú. Prosesu : 0026/16. PDBAU
Kompozisaun Tribunál : Kolektivu
Juis : Dr. Ercilia de Jesus
Dr. Afonso Carmona
Dr. Jose Goncalves
Prokuradór : Dra. Bemvinda do Rosario
Defeza : Dr. Sidonio M. Sarmiento
Tipu pena : Pena multa US\$90.00

Iha 8 Marsu 2017, Tribunál Distritál Baucau liuhosi Tribunál movél iha Distritu Manatuto prezide julgamentu leitura akordaun ba krime danu agravadu ne'ebé envolve arguidu APG hasoru Estadu RDTL, iha Suku Bahu, Sub-distritu Baucau Vila, Distritu Baucau.

Akuzasaun husi Prokuradór

Prokuradór akuza katak iha 2 Abril 2016, iha tuku 12.00 meudia, arguidu ho testemuña AP diskute malu kona-ba bee ne'ebé arguidu liga ba nia uma, tanba ne'e arguidu hirus silu tohar tiha torneira bee nian ne'ebé uza ba públiku.

Prokuradór akuza arguidu kontra artigu 259 Kódigu Penál kona-ba krime danu agravadu ho moldura penal tinan 2 to'o tinan 8.

Produsaun ba prova

Iha julgamentu, arguidu deklara katak iha sira nia bairo wainhira bee mai, se mak haree uluk nia mak liga uluk ba nia uma no liga hotu mak husik fali ba sira seluk. Momentu ne'e arguidu mak liga uluk no testemuña mai hasai tiha arguidu nia mangeira, tanba ne'e arguidu hirus silu tohar tiha besi refere. Maibé iha fulan Outubru 2016 arguidu sosa fali kanu foun no tau fali ona, agora dadaun sira bele asesu fali ona.

Alegasaun finál

Prokuradór haktuir katak arguidu estraga duni sasan ne'ebé uza ba publiku, maibé arguidu rekopera fali ona sasan ne'ebé arguidu estraga. Tanba ne'e husu ba Tribunál aplika pena multa ba arguidu.

Enkuantu Defeza haktuir katak bazeia ba produsaun provas, husu ba Tribunál atu aplika pena ne'ebé la limite arguidu nia liberdade.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$90.00 no sei selu US\$1.00 kada loron durante loron 90. Tribunál fiksa mós pena alternativa durante loron 60 prizaun, wainhira arguidu la kumpri pena multa ne'e no selu mós kustu judisial US\$20.00.

8. Krime ofensa ba integridade fizika simples ho natureza violensia domestika

Nú. Prosesu : 0062/16. MNMNT
Kompozisaun Tribunál : Singular
Juis : Dra. Ercilia de Jesus
Prokuradór : Dr. Luis H. Rangel da Cruz
Defeza : Dr. Grigorio de Lima
Tipu pena : Pena prizaun fulan 4 suspende ba tinan 1

Iha 9 Marsu 2017 Tribunál Distrital Baucau liu husi Tribunál movel iha Distritu Manatuto prezide leitura sentensa ba krime ofensa ba integridade fizika simples ho natureza violénsia doméstika ne'ebe envolve arguidu CS hasoru nia feen, iha Distritu Manatuto.

Akuzasaun husi Prokuradór

Prokuradór akuza katak, iha 14 Novembru 2016, iha tuku 13.00 meudia, arguidu basa dala 2 iha lezada nia tilun hun no tuku dala 3 iha lezada nia hasan.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu konfesa faktus hotu iha akuzasaun, diak malu ona ho lezada, arrepende ona nia hahalok, foin primeira-vez mai hatan iha Tribunál. Iha parte seluk lezada kontinua konfirma faktus sira iha akuzasaun.

Alegasaun finál

Prokuradór haktuir katak arguidu konfesa faktus hotu iha akuzasaun, arepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena prizaun fulan 4 suspende ba tinan 1.

Defeza mós subliña katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekua ba arguidu.

Desizaun

Depoisde avalia faktus provadu sira ne'ebé produz durante julgamentu, Tribunál konklui prosesu ne'e no kondena arguidu ho pena prizaun fulan 4 suspende ba tinan 1 no selu mós kustu judicial US\$10.00.

9. Krime ofensa ba integridade fizika simples ho natureza violénsia doméstika

Nú. Prosesu : 0011/15. BCBCV
Kompozisaun Tribunál : Singular

Juis : Dr. Jose Goncalves
Prokuradór : Dra. Bemvinda do Rosario
Defeza : Dr. Jose M. Guterres (Defensória Pública)
Tipu pena : Pena multa US\$ 60.00

Iha 10 Marsu 2017 Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu ZMdR hasoru nia feen, iha Distritu Baucau.

Akuzasaun husi Prokuradór

Prokuradór akuza katak, iha 15 Feveireiru 2015, iha tuku 09.00 dadersan, arguidu basa dala 2 iha lezada nia hasan parte karuk no basa dala 1 iha lezada nia hasan parte loos no kaer ho maka'as iha lezada nia kanuruk rezulta moras no bubu iha lezada nia kanuruk.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklara katak foin primeira-vez mai hatan iha Tribunál, diak malu ona ho lezada, arepende ona nia hahalok no promete iha futuru sei la komete tan krime hasoru lezada.

Aleinde ne'e lezada kontinua konfirma faktus sira iha akuzasaun, lezada mós deklara katak depoisde akontesementu ne'e arguidu ho lezada hela ketak-ketak. Maibe liutiha fulan balun, iha 26 Outubru 2015 mak arguidu ho nia familia hasoru lezada nia familia no sira konsege rejolve tuir kustume Timor nian no agora dadaun sira moris hamutuk nu'udar feen laen.

Alegasaun finál

Iha alegasaun finál, Prokuradór haktuir katak arguidu konfesa faktus hotu, foin primeira-vez mai hatan iha Tribunál, no diak malu ona ho lezada. Tanba ne'e husu ba Tribunál aplika pena multa ba arguidu.

Enkuantu Defeza mós subliña tan katak arguidu konfesa faktus hotu iha akuzasaun, arepende ona nia hahalok no foin primeira-vez mai hatan iha Tribunál, arguidu ho inisiativa rasik diak malu fali ho lezada. Tanba ne'e husu ba Tribunál aplika pena ne'ebé adekuaudu ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$60.00 no sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, wainhira arguidu la kumpri pena multa ne'e.

10. Krime ofensa ba integridade fizika simples no ameasa

Nú. Prosesu : 0013/16. BCLGA
Kompozisaun Tribunál : Singular
Juis : Dr. Afonso Carmona
Prokuradór : Dra. Bemvinda do Rosario
Defeza : Dr. Sidonio M. Sarmento
Tipu pena : Pena multa US\$ 60.00

Iha 10 Marsu 2017 Tribunál Distrital Baucau prezide julgamentu leitura sentensa ba krime ofensa ba integridade fizika simples no ameasa ne'ebé envolve arguidu SdSG hasoru lezadu DS no lezada JG, iha Suku Nunira, Sub-distritu Laga, Distritu Baucau.

Akuzasaun husi Prokuradór

Prokuradór akuza katak, iha 28 Abril 2016, iha tuku 20.00 kalan, arguidu tuku dala 10 iha lezadu nia kotuk laran no lezadu nia tilun too lezadu monu ba rai. Arguidu kontinua ba foti katana atu taa lezadu, nune'e lezadu hamrik no halai no lezada JG rona ema barak hakilar no lezada ba iha fatin akontesementu arguidu baku ona lezadu DS. Tanba ne'e lezada (JG) hase arguidu no arguidu ameasa lezada dehan *"imi mangame hau taa mate hotu imi mak hau ba komarka."*

Kazu ne'e akontese tanba wainhira lezadu DS taka hela lutu to'os nian ne'ebé naksobu iha uma sorin, derepente arguidu tolok no hakilar lezadu DS, tanba ne'e lezadu ba hase arguidu no arguidu halo agresun hasoru lezadu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples no artigu 157 Kódigu Penál kona-ba krime ameasa.

Produsaun ba prova

Iha julgamentu, arguidu deklara katak iha akontesementu ne'e arguidu ho kolega sira joga hela karta iha Sr. Luis nia uma no lezadu DS koalia bei-beik katak arguidu mak duni nia fahi ba lezadu nia uma hodi estraga lutu. Tanba ne'e arguidu hirus no hamrik basa dala 1 iha lezadu niaibun, tuku dala 5 iha lezadu nia kotuk laran no tuku dala 1 iha lezadu nia hasan parte loos. Aleinde ne'e, arguidu mós rekoñese katak nia ameasa duni lezadu no lezada. Iha parte seluk lezadu no lezada kontinua konfirma faktus hotu iha akuzasaun.

Alegasaun finál

Prokuradór haktuir katak bazeia ba faktus provadu sira iha julgamentu arguidu provadu komete krime hasoru lezadu no lezada. Tanba ne'e husu ba Tribunál aplika pena prizaun tinan 1 suspende ba tinan 1.

Enkuantu Defeza haktuir katak krime ne'e akontese tanba hetan provokasun hosi lezadu, arguidu foin primeira-vez mai hatan iha Tribunál, arrepende ona nia hahalok. Tanba ne'e husu ba Tribunal aplika pena ne'ebé adekuadu ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$60.00 no sei selu 0.50 sentavus kada loron durante loron 120. Tribunál fiksa mós pena alternativa durante loron 80 prizaun, wainhira arguidu la kumpri pena multa ne'e.

11. Krime ameasa no ofensa ba integridade fizika simples ho natureza violénsia doméstika

Nú. Prosesu : 0003/15. BCPVN
Kompozisaun Tribunál : Singulár
Juis : Dr. Jose Goncalves
Prokuradór : Dr. Luis H. Rangel da Cruz
Defeza : Dr. Antonio Fernandes
Tipu pena : Pena prizaun fulan 4 suspende ba tinan 1

Iha 10 Marsu 2017, Tribunál Distritál Baucau julga kazu krime ameasa no ofensa ba integridade fizika simples ho natureza violénsia doméstika ne'ebé envolve arguidu JdS hasoru nia feen, iha Distritu Baucau.

Akuzasaun husi Prokuradór

Prokuradór akuza katak iha 29 Juñu 2015, iha tuku 15.00 lokraik, arguidu lori ensada baku dala 2 iha lezada nia liman parte loos no habit lezada nia kabun. Iha akontesementu ne'e lezada ba ható'o kedas keixa iha Polisia Eskuadra Venilale no kontinua ba halo tratamentu iha Centru Saùde Venilale.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba Prova

Iha julgamentu, arguidu konfesa faktus hotu iha akuzasaun, arguidu mós deklarata katak foin primeira-vez mai hatan iha Tribunál, no diak malu ona ho lezada. Arguidu mós promete iha futuro sei la baku tan lezada, arrepende ona nia hahalok.

Alegasaun finál

Iha alegasaun finál, Prokuradór haktuir katak bazeia ba produsaun provas iha julgamentu, arguidu provadu komete krime hasoru lezada. Tanba ne'e husu ba Tribunál aplika pena prizaun fulan 4 suspende ba tinan 1.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekuaudu ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 4 suspende ba tinan 1.

12. Krime abuzu seksuál ba menór*

Nú. Prosesu	: 0058/16. PDBAU
Kompozisaun Tribunál	: Kolektivu
Juis	: Dr. Jose Quintao Dr. Antonio Fonseca Dr. Hugo da Cruz Pui
Prokuradór	: Dra. Bemvida do Rosario
Defeza	: Dr. Antonio Fernandes (Defensoria Publika)
Tipu pena	: Pena prizaun tinan 28

Iha 14 Marsu 2017, Tribunál Distrital Baucau prezide leitura akordaun ba krime abuzu seksuál ba menór ne'ebé envolve arguidu AM nu'udar aman hasoru nia-oan fetu rasik ne'ebé ho idade tinan 13, iha Distritu Lautem.

Akuzasaun husi prokuradór

Prokuradór akuza katak iha loran, fulan no tinan ne'ebé la-apuradu, arguidu komete krime abuzu seksuál ba menór hasoru nia oan rasik ne'ebé sei iha idade tinan 13. Iha akontesementu dala-uluk, arguidu tama ba lezada nia kuartu laran, taka lezada nia ibun no halo relasaun seksuál ho lezada no depoisde akontesementu liu tiha minutu sanulu arguidu kontinua halo tan relasaun seksuál ho lezada.

Tuir-mai, maizumenus iha oras madrugada, arguidu tama ba lezada nia kuartu no kebit lezada nia-ain atu halo relasaun seksuál ho lezada maibé lezada rezeita. Tanba ne'e, arguidu siak atu baku lezada no haruka lezada ba haris fatin. Lezada sente tauk no halo tuir deit, no wainhira iha haris fatin laran arguidu kontinua halo relasaun seksuál ho lezada.

Depoisde akontesementu segundu liu tiha semana ida, iha madrugada wainhira lezada toba hela arguidu tama ba lezada nia kuartu ho siak haruka lezada ba haris fatin. Arguidu tuir ba no hasai lezada-nia roupa no haruka lezada toba iha semente leten, hafoin arguidu halo relasaun seksuál ho lezada. Aktu hirak ne'e kauza lezada gravida, no wainhira lezada gravida ona fulan 3 arguidu dehan ba lezada katak "*wainhira ema ruma husu oan ne'e se nian, lezada tenki hatan katak oan ne'e lezada nia aman ki'ik nian.*"

* Favor lee komunikadu Imprensa JSMP: *Tribunál Distritál Baucau hamonu pena úniku tinan 28 prizaun ba arguidu iha krime abuzu seksuál ba menór ho natureza incestu,* iha JSMP nia website: [www.jsmp.tl](http://jsmp.tl) ou bele asesu direita iha link ne'e http://jsmp.tl/wp-content/uploads/2017/01/PrKazu-INSESTUAbuzuseksualhopenaprizau-tinan28Baucau_Tetum.pdf

Wainhira lezada grávida hela fulan 5, iha tuku 13.00 meudia, wainhira lezada toba hela iha kuartu laran, arguidu tama ba lazada nia kuartu no halo tan relasaun seksuál ho lezada. Depoizde lezada partus liu tiha fulan 6, maizumenus iha tuku 04.00 madrugada, arguidu kontinua tama ba lezada nia kuartu no halo relasaun seksuál ho lezada. Kazu ne'e foin deskobre iha 25 Maiu 2016, wainhira lezada akompaña nia alin mai Dili atu ba rai liur.

Prokuradór akuza arguidu kontra artigu 177 alinea 1 Kódigu Penál kona-ba krime abuzu seksuál ba menor no artigu 41 Kódigu Penál kona-ba krime kontinuada, artigu 52 alinea 2 letra (l) no (m) Kódigu Penál kona-ba sirkunstánsia agravantes jéral iha ámbitu dexendente no vulnerável, konjuga ho artigu 2, 3, 35 no 36 LKVD.

Produsaun ba prova

Iha julgamentu, arguidu nega faktus hotu iha akuzasaun. Entretantu, lezada kontinua konfirma no reforsa faktu sira iha akuzasaun Prokuradór nian.

Alegasaun finál

Prokuradór haktuir katak mezmú arguidu nega faktus hotu iha akuzasaun, maibé lezada nu'udar arguidu nia oan nafatin konfirma no reforsa faktus hotu iha akuzasaun. Tanba ne'e husu ba Tribunál aplika pena prizaun tinan 17 ba arguidu.

Enkuantu Defeza haktuir katak arguidu deklarata katak la komete krime ne'e, Tanba ne'e husu ba Tribunál absolve arguidu.

Desizaun

Depoizde avalia faktus provadu sira ne'ebé produs durante julgamentu, Tribunál prova arguidu komete krime iha konkursu hasoru lezada tanba ne'e Tribunál halo kumulasaun juridiku hodi kondena arguidu ho pena únika tinan 28 prizaun.

13. Krime ameasa

Nú. Prosesu	: 0020/16. BCBCV
Kompozisaun Tribunál	: Singulár
Juis	: Dr. Afonso Carmona
Prokuradór	: Dra. Bemvinda do Rosario
Defeza	: Dr. Antonio Fernandes
Tipu pena	: Omologa pedidu dezisténsia keixa

Iha 15 Marsu 2017, Tribunál Distritál Baucau prezide julgamentu tentativa konsiliaun ba krime ameasa ne'ebé envolve arguidu JdCS hasoru lezadu JAG (arguidu nia rian), iha Suku Loilubu, Sub-distritu Vemasse, Distritu Baucau.

Akuzasaun husi Prokuradór

Prokuradór akuza katak iha 24 Abril 2016, iha tuku 12.15 meudia, wainhira lezadu ba bolu nia feen no oan sira iha lezadu nia banin nia uma, tanba labarik sira atu tama fali eskola, lezadu haree arguidu kaer katana ta'a tun ta'a sae no dehan katak lezadu labele ba arguidu nia uma no arguidu mós ameasa atu oho lezadu.

Prokuradór akuza arguidu kontra artigu 157 Kódigu Penál kona-ba krime ameasa ho moldura penal too tinan 1 ka multa.

Produsaun ba prova

Antes tama ba produsaun ba provas, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu tentativa konsiliaun ne'e, lezadu hakarak deziste tiha nia keixa hasoru arguidu tanba entre arguidu no lezadu sei iha relasaun familia no hakarak kria fali relasaun diak iha futuru no arguidu mós husu diskulpa ba lezadu.

Prokurador no Defeza konkorda no apresia akordu ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia keixa hosi lezadu, Tribunál omologa akordu ne'e.

14. Krime pekulatu ho uzu

Nú. Prosesu	: 0598/12. PDBAU
Kompozisaun Tribunál	: Kolektivu
Juis	: Dr. Afonso Carmona Dr. Jose Goncalves Dra. Ercilia de Jesus
Prokuradór	: Dr. Alfonso Lopez
Defeza	: Dr. Grigorio de Lima (Defensória Pública)
Tipu pena	: Pena prizaun fulan 6 suspende ba tinan 1

Iha 16 Marsu 2017 Tribunál Distritál Baucau liuhosi Tribunal movel iha Distritu Manatuto prezide julgamentu leitura sentensa ba krime pekulatu de uzu ne'ebé envolve arguidu PM (Sarjentu PNTL tranzitu Munisipiu Manatuto) hasoru Estadu RDTL, iha Sub-distritu Manatuto, Distritu Manatuto.

Akuzasaun husi Prokuradór

Prokuradór akuza katak iha 7 Abril 2013, arguidu lori kareta ho sapa matrikula 04096 G. no tula testemuña LdS (Komandante PNTL Distritu Manatuto) atu tuir enkontru iha Dili. Depoisde arguidu hatun tiha testemuña iha Dili, testemuña haruka arguidu fila fali ba Manatuto no para kareta iha edifisiu no save kareta entrega ba motorista. Arguidu para duni kareta iha edifisiu maibe save kareta nian arguidu la entrega.

Iha 8 Abril 2013, iha tuku 03.00 madrugada, arguidu la fo hatene seguransa turnu no la iha autorizasaun hosi arguidu nia komandante arguidu lori kareta no hetan asidente iha masin Manatuto no rezulta kareta aat makaas. Estragus ne'e rezulta estadu tenke hasai fali osan hodi hadia fali kareta ne'e ho total osan US\$12.000.00.

Prokuradór akuza arguidu kontra artigu 296 Kódigu Penál kona-ba krime pekulatu ho uzu konjuga ho artigu 3 dekretu lei No.8/2003.

Produsaun ba prova

Iha julgamentu, arguidu deklara katak wainhira arguidu tula tiha testemuña too iha Dili no fila ba Manatuto arguidu atu intrega save ba motorista, maibé motorista lisensa tiha, nune'e arguidu lori tiha save ba uma no kareta ne'ebé arguidu uza kareta *task-force* nian. Iha kalan sofer bis telefone arguidu katak iha asidente iha areia entre Laleia no Manatuto nia klaran. Tanba ne'e arguidu ba, maibé laiha asidente no arguidu fila mak hetan asidente. Arguidu mós rekuñese nia sala tanba uza kareta la fo hatene komando no depoisode asidente ne'e arguidu hetan suspensaun durante fulan 6 no la simu nia salariu.

Testemuña DdA nu'udar motorista PNTL nian depoimenta katak iha 6 too 7 Abril 2013, testemuña husu lisensa vizita familia iha foho. Iha 7 Abril 2013 kalan, Komandante LdS telefone testemuña katak 8 Abril 2013, testemuña tula finansa atu tuir enkontru iha Dili, maibé wainhira testemuña ho finansa too iha edificiu kareta laiha. Tanba ne'e, testemuña ho finansa uza fali kareta seluk no wainhira too iha Behau mak arguidu foin hatene akontesementu ne'e tanba sentru komunikaun mak telefone.

Testemuña LdS nu'udar Komandante PNTL Distritu Manatuto depoimenta katak momentu ne'e uza fali kareta *task-force* nian tanba kareta komandante nian hadia hela no motorista mós lisensa hela. Testemuña husu atu arguidu bele tula hela testemuña mai Dili. Wainhira to'o iha Dili testemuña haruka arguidu fila ba Manatuto no para kareta iha edificiu no entrega save ba motorista.

Alegasaun finál

Prokuradór haktuir katak arguidu konfesa faktus no rekuñese nia sala, tanba ne'e husu ba Tribunál aplika pena prizaun ho ezekusaun suspensaun.

Enkuantu Defeza haktuir katak arguidu rekuñese nia sala no arguidu mós hetan ona suspensaun durante fulan 6 no la simu ninia salariu. Tanba ne'e husu ba Tribunál aplika pena admoestasaun ba arguidu.

Desizaun

Depoisode avalia faktus hotu, bazeia ba produsaun prova durante julgamentu, Tribunál kondena arguidu ho pena prizaun fulan 6 suspende ba tinan 1.

15. Krime danu simples

Nú. Prosesu	: 0028/16. PDBAU
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Luis H. Rangel da Cruz
Defeza	: Dr. Sidonio M. Sarmiento
Tipu pena	: Omologa pedidu dezisténsia keixa

Iha 16 Marsu 2017, Tribunál Distritál Baucau prezide julgamentu tentativa konsiliaun ba krime danu simples ne'ebé envolve arguidu AX hasoru lezadu LP, iha Distritu Baucau.

Akuzasaun husi Prokuradór

Prokuradór akuza katak iha 17 Abril 2016, iha tuku 10.00 dadersan, arguidu estraga lezadu nia ai-horis iha to'os-laran hanesan hudi hun 12, ai-farina hun 20, du'ut morin hun 25, aidila hun 10, kontas hun 20, no fehuk midar hun 10. Esstragus hirak ne'e hamosu prejuizu ba lezadu ho total osan \$810.00. Kazu ne'e akontese tanba antes ne'e arguidu ho lezadu iha ona problema kona-ba rai ne'e.

Prokuradór akuza arguidu kontra artigu 258 Kódigu Penál kona ba krime danu simples ho moldura penal too tinan 3 ka multa.

Produsaun ba prova

Antes tama ba produsaun ba provas, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu tentativa konsiliaun ne'e, lezadu hakarak deziste tiha keixa hasoru arguidu no husu ba Tribunál prepara akta ida atu iha futuru arguidu labele komete tan kualker krime hasoru lezadu. Iha perte seluk, arguidu konkorda no entrega osan US\$50.00 ba lezadu no husu diskulpa ba lezadu.

Prokuradór no Defeza konkorda no apresia akordu ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu hosi parte sira Tribunál omologa dezisténsia keixa ne'e.

16. Krime maus tratus ba kónjuje

Nú. Prosesu	: 0002/16. BCVMS
Kompozisaun Tribunál	: Singulár
Juis	: Dr. Afonso Carmona : Dr. Jose Goncalves : Dra. Ercilia de Jesus
Prokuradór	: Dr. Alfonso Lopez
Defeza	: Dr. Americo Luis Freitas Belo (Advogadu CJP)
Tipu pena	: Pena prizaun tinan 3 suspende ba tinan 3

Iha 17 Marsu 2017, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu AC hasoru nia feen, iha Distritu Baucau.

Akuzasaun husi Prokuradór

Prokuradór akuza katak iha 27 Feveiriu 2016, iha tuku 16.00 lokraik, arguidu foti bee aquase masa kiik ne'ebé sei nakonu hela (600 mil) tuda ba lezada nia matan

okos parte loos. Aktu ne'e rezulta lezada sofre moras no bubu halo lezada oin nakukun no monu ba rai no ba halo tratamentu iha Centru Saúde Vemasse.

Iha tinan 2015, sein motivu ne'ebé klaru arguidu baku lezada nia matan to'o bubu no arguidu sempre baku lezada. Antes ne'e, iha tinan 2013, iha momentu ne'ebé lezada foin iha kondisaun postu-partu no nia-oan sei nurak hela arguidu mós baku lezada.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal too tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu deklara katak iha faktus balu loos no balu laloos. Faktus ne'ebé loos mak iha 27 Feveireiru 2016 deit. Enkuantu ba faktus ne'ebé akontese iha 2015 no 2013 laloos. Arguidu mós deklara katak depoisde akontesementu iha 27 Feveireiru 2016, arguidu nia familia tu'ur hamutuk ho lezada nia familia no sira konsege rezolve problema ne'e no arguidu husu diskulpa ona ba lezada no fó ona osan US\$2.500.00.

Maibe iha 9 Agostu 2016, arguidu lori nu'u maran baku dala 4 iha lezada nia ulun no dala 3 iha lezada nia ain. Tanba ne'e lezada ho familia tu'ur hamutuk fali ho arguidu nia familia hodi intrega fali arguidu nia osan US\$2,500.00 ne'ebé antes ne'e arguidu fo ona ba lezada ho nia familia.

Testemuña AdS nu'udar lezada nia aman depoimenta katak la haree akontesementu ne'e, testemuña rona deit husi lezada. Testemuña hatutan katak momentu ne'e testemuña hola sigaru iha arguidu ho lezada nia kios no la hatene kona-ba problema ne'e.

Alegasaun finál

Prokuradór haktuir katak, mezmu arguidu nega faktus balun, maibé lezada kontinua konfirma faktus hotu iha akuzasaun, tanba ne'e husu ba Tribunál ho justisa ba arguidu.

Enkuantu Defeza haktuir katak arguidu konfesa deit faktus ne'ebé nia komete, tanba ne'e husu ba Tribunál halo alterasaun juridíka husi artigu 154 KP ba fali artigu 145 KP kona krime ofensa ba integridade fizika simples.

Desizaun

Depoisde avalia faktus ne'ebé produs durante julgamentu, Tribunál prova katak arguidu komete duni krime tuir faktus husi akuzasaun Prokuradór. Bazeia ba provas ne'e, Tribunál kondena arguidu ho pena prizaun tinan 3 suspende ba tinan 3 no indemnizasaun ba lezada ho osan US\$200.00 no selu mós kustu judisial US\$30.00.

17. Krime danu simples

Nú. Prosesu : 0111/15. PDBAU

Kompozisaun Tribunál : Singulár
Juis : Dr. Jose Escurial
Prokuradór : Dra. Bemvinda do Rosario
Defeza : Dr. Lino Lopes (Advogadu ECM)
Tipu pena : Omologa pedidu dezisténsia keixa

Iha 22 Marsu 2017, Tribunál Distritál Baucau prezide julgamentu tentativa konsiliaisaun ba krime danu simples ne'ebé envolve arguidu AdS hasoru lezada RR, iha Sub-distritu Bagaia, Distritu Baucau.

Akuzasaun husi Prokuradór

Prokuradór akuza katak iha 7 Novembru 2014, iha tuku 08.00 dadersan, sein kuñesementu lezada nian, arguidu lori sensor ko'a ai nian tesi tiha lezada nia nu'u hun ida no hamosu prejuizu ba lezada ho valor osan US\$30.00.

Prokuradór akuza arguidu kontra artigu 258 Kódigu Penál kona ba krime danu simples ho moldura penal too tinan 3 ka multa.

Produsaun ba prova

Antes tama ba produsaun ba provas, bazeia ba artigu 262 KPP kona-ba tentativa ba konsiliaisaun, juis husu atu halo tentativa konsiliaisaun ba arguidu no lezada.

Iha prosesu konsiliaisaun ne'e, lezada hakarak deziste nia keixa hasoru arguidu no hakarak koalia tuir kultura tanba lezada ho arguidu avo mane ida deit no hela hamutuk iha knua ida no hotu-hotu iha direitu ba nu'u refere. Arguidu husu diskulpa ba lezada no konkorda ho pedidu dezisténsia husi lezada.

Prokuradór no Defeza konkorda no apresia akordu ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia husi lezada, no akordu dame malu hosi parte sira, Tribunál omologa pedidu dezisténsia ne'e.

18. Krime tentativa omisídiu agravadu

Nú. Prosesu : 0822/14. PDBAU
Kompozisaun Tribunál : Kolektivu
Juis : Dr. Jose Goncalves
Dr. Afonso Carmona
Dra. Ercilia de Jesus
Prokuradór : Dr. Alfonso Lopez
Defeza : Dr. Grigorio de Lima
Tipu pena : Pena prizaun tinan 6 iha kadeia

Iha 24 Marsu 2017, Tribunál Distritál Baucau prezide julgamentu leitura akordaun ba krime tentativa omisídiu ne'ebé envolve arguidu GGdC hasoru nia-feen, iha Distritu Manatuto.

Akuzasaun husi Prokuradór

Prokuradór akuza katak iha 13 Dezembru 2008, iha tuku 13.00 meudia, arguidu sira ho familia lao tui-tuir malu ho intensaun ba Aldeia Salau. Wainhira to'o iha mota Lekidasi arguidu haree familia sira lao do'ok ona arguidu lao hosi lezada nia kotuk hasai katana ne'ebé sikat iha arguidu nia kanotak taa dala 1 iha lezada nia kanuruk, taa dala 1 lezada nia kanotak, dala 1 iha lezada nia kabas karuk no taa dala 1 iha lezada nia liman to'o kotu. Wainhira lezada monu ba rai arguidu kontinua taa dala 3 iha lezada nia liman laran, taa dala 2 iha lezada nia ain karuk, taa dala 2 lezada nia kidan parte karuk. Aktu ne'e rezulta lezada tenke baixa fulan 7 iha Óspital Nasional Guidu Valadares Dili.

Prokuradór akuza arguidu kontra artigu 23 Kódigu Penál kona-ba tentativa no artigu 139 Kódigu Penál kona-ba krime omisídiu agravadu konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu deklara katak t'a dala 4 deit no wainhira lezada monu tun arguidu kous fali lezada. Kona-ba faktus seluk arguidu nega, arguidu mós deklara katak taa lezada tanba diskunfia lezada ba mane seluk. Iha parte seluk lezada kontinua konfirma faktu sira iha akuzasaun, lezada mós deklara katak wainhira lezada monu rai arguidu hamrik hein deit lezada, lezada iha fali konsensia wainhira baixa iha Óspital Nasional Dili, agora lezada lao iha loron manas la diak tanba kanek sira ne'e sei moras hela.

Alegasaun finál

Prokuradór haktuir katak, mezmú arguidu nega faktus balun, maibé lezada kontinua konfirma faktus hotu iha akuzasaun. Tanba ne'e husu ba Tribunál aplika pena prizaun ba arguidu.

Enkuantu Defeza haktuir katak arguidu konfesa deit faktus ne'ebé nia komete, tanba ne'e husu ba Tribunál fó justisa ba arguidu.

Desizaun

Depoisde avalia faktus sira durante julgamentu, Tribunál prova katak arguidu komete duni krime tuir faktus sira husi akuzasaun Prokuradór no kondena arguidu ho pena prizaun tinan 6.

19. Krime danu simples

Nú. Prosesu	: 0006/16. MNMNT
Kompozisaun Tribunál	: Kolektivu
Juis	: Dr. Afonso Carmona
Prokuradór	: Dr. Alfonso Lopez

Defeza : Dr. Grigorio de Lima
Tipu pena : Omologa pedidu dezisténsia keixa

Iha 7 Marsu 2017, Tribunál Distritál Baucau liu hosi Tribunál movel iha Distritu Manatuto prezide julgamentu tentativa konsiliaisaun ba krime danu simples ne'ebé envolve arguidu JES, LMS, IdJS, RGS, TS, MBS, BGS, JS no FGS hasoru lezadu DS, iha Sub-distritu Manatuto, Distritu Manatuto.

Akuzasaun husi Prokuradór

Prokuradór akuza katak iha 2 Feveireiru 2016, iha tuku 16.00 lokraik, arguidu BGS kaer ho aidona ida baku rahun sumbrina bo'ot ne'ebé lezadu hari iha nia uma oin hodi fa'an SDSB iha okos no foti fatuk tuda dala 1 iha lezadu nia kotuk laran no rezulta lezadu monu ba rai. Wainhira lezadu nia feen haree lezadu monu ba rai kaer lezadu nia liman no dada tama ba uma laran. Maibe depois arguidu sira hakilar buan manas han ema no arguida IdJS, RGS no TS kontinua baku rahun vazú aifunan nian hamutuk 22. Kada vazú ida folin US\$5.00 no arguidu FGS estraga kadeira masa 3; kada kadeira ho folin US\$8.00, basia boot 2; ho folin US\$20.00. Enkuantu arguidu MBS no JES hakilar buan manas, han ema, ahi lakan sai hosi kidun no kontinua tuda estraga kalen. Kazu ne'e akontese tanba arguidu sira deskonfia lezadu halo aimoruk ba arguidu JES nia oan mate.

Prokuradór akuza arguidu sira kontra artigu 260 Kódigu Penál kona-ba krime danu ho violénsia ho nia moldura penal tinan 4 too tinan 12 .

Produsaun ba prova

Iha julgamentu, arguidu IdJS, RGS, TS, MBS, JS no FGS hili direitu nonok, enkuantu arguidu JES, LMS no BGS hakarak fó sira ninia deklarasaun. Arguidu JES deklara katak iha akontesementu ne'e arguidu tuda uma dala 1 no hakilar deit katak lezadu buan manas han ema.

Arguidu LSM deklara katak momentu arguidu ko'us hela nia oan derepente arguidu sira seluk ba hakilar iha lezadu nia uma, tanba ne'e mak arguidu mós ba haree maibé la halo buat ruma.

Arguidu BGS deklara katak momentu ne'e arguidu iha nia uma laran rona ema ida lao iha uma oin koalía kona-ba labarik ne'ebe mate ona, nune'e arguidu sai hosi uma laran ba husu tuir lezadu ho hirus hodi fukit sai sumbriña boot no baku rahun sasan, lezadu halai ba uma laran no arguidu la tuda lezadu.

Iha parte seluk lezadu konfirma faktu sira iha akuzasaun, lezadu mós deklara katak arguidu BGS tuda kios mak fatuk nakfera no kona lezadu nia hirus matan. Lezadu deklara liu tan katak arguidu sira rekopera fali ona lezadu nia sasan ne'ebé arguidu sira estraga ho valor osan US\$800.00.

Testemuña FBdS nu'udar lezadu nia feen depoimenta katak iha akontesementu ne'e testemuña ho lezadu iha sira nia uma, derepente arguidu sira mosu mai hakilar dala barak dehan "*buan manas*" no kontinua estraga sasan. Testemuña

hare arguidu BGS fukit sai sumbrina no baku rahun sasan, no derepente testemuña haree lezadu monu tanba ne'e testemuña lori tama lezadu iha uma laran hodi subar. Depoisde arguidu sira fila tiha testemuña no lezadu sai husi uma laran haree bazu aifunan hamutuk 22 rahun, kadeira masa rahun no basia boot 2 rahun.

Alegasaun finál

Prokuradór haktuir katak arguidu nain 6 hili direitu nonok maibe arguidu nain 3 disponivel atu fo sira nia deklarasaun. Bazeia ba faktu hirak ne'e, husu ba Tribunál halo atenuasaun extraordinariu no aplika pena prizaun maibe suspende nia ezekusaun.

Enkuantu Defeza haktuir katak arguidu nain nain 3 konfesa deit faktus ne'ebé sira komete no arguidu sira rekopera fali ona lezadu nia sasan ne'ebé sira estraga. Tanba ne'e husu ba Tribunál halo alterasaun juridíka husi artigu 260 KP ba fali artigu 258 KP kona-ba danu simples.

Desizaun

Depoisde avalia faktus provadu sira ne'ebé produs durante julgamentu, Tribunál halo alterasaun juridíka husi artigu 260 KP ba fali artigu 258 KP, tanba sasan ne'ebé arguidu sira estraga ho valor US\$275.00 deit no arguidu sira fo ona osan ba lezadu liu husi total prejuízu antes julgamentu, no sira diak malu ona no lezadu mós perdua ona arguidu sira.

Bazeia ba pedidu dezisténsia hosi lezadu no akordu dame hosi parte sira, Tribunál konklui no omologa prosesu ne'e.

20. Krime maus tratus ba kónjuje

Nú. Prosesu	: 0901/14. PDBAU
Kompozisaun Tribunál	: Kolektivu
Juis	: Dr. Afonso Carmona Dr. Jose Goncalves Dr. Ercilia de Jesus
Prokuradór	: Dr. Luis H. Rangel da Cruz
Defeza	: Dr. Grigorio de Lima
Tipu pena	: Pena prizaun tinan 2 suspende ba tinan 3

Iha 24 Marsu 2017, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu IdCS hasoru nia feen, iha Distritu Baucau.

Akuzasaun husi Prokuradór

Prokuradór akuza katak iha 4 Outubru 2014, iha tuku 10.00 kalan, arguidu kaer lezada nia liman ho maka'as, no lezada foti sinelus baku dala 1 iha arguidu nia ulun. Iha tinan 2012 arguidu tuku dala 1 iha lezada nia kotuk laran. Iha tinan 2008 iha Dili arguidu diskute malu ho lezada.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklarata katak diak malu ona ho lezada, arrepende ona nia hahalok no foin primeira-vez mai hatan iha Tribunál.

Alegasaun finál

Prokuradór haktuir katak bazeia ba produsaun provas arguidu provadu komete krime hasoru lezada. Tanba ne'e husu ba Tribunál aplika pena prizaun ho ezekeusaun suspensaun no selu mós kustu judisial.

Enkuantu Defeza haktuir katak arguidu konfesa faktus hotu iha akuzasaun, diak malu ona ho lezada, no arrepende ona nia hahalok. Tanba ne'e husu ba Tribunál aplika pena ne'ebé adekua ba arguidu.

Desizaun

Depoizde avalia faktus hotu, Tribunál konklui katak arguidu provadu komete krime hasoru lezada no kondena arguidu ho pena prizaun tinan 2 suspende ba tinan 3 no selu mós kustu judisial US\$40.00.

21. Krime ofensa ba integridade fizika simples ho natureza violénsia doméstika

Nú. Prosesu	: 0008/17. BCSIC
Kompozisaun Tribunál	: Singular
Juis	: Dr. Jose Goncalves
Prokurador	: Dr. Luis H. Rangel da Cruz
Defeza	: Dr. Jose Guterres
Tipu pena	: Pena multa US\$120.00

Iha 28 Marsu 2017 Tribunál Distrital Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MF hasoru nia feen, iha Distritu Baucau.

Akuzasaun husi Prokuradór

Prokuradór akuza katak, iha 10 Janeiru 2015, arguidu tuku dala 2 iha lezada nia kotuk laran no dulas lezada nia liman no kauza lezada sofre moras no bubu. Lezada ba hato'o kedas keixa iha polisia no depois ba halo tratamentu iha ospital no hela iha Uma Paz durante loron 5.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklara katak foin primeira-vez mai hatan iha Tribunál, diak malu ona ho lezada no arrepende ona nia hahalok. Arguidu mós promete sei la baku tan lezada iha futuro. Iha parte seluk lezada kontinua konfirma faktus sira iha akuzasaun Prokuradór

Alegasaun finál

Prokuradór haktuir katak arguidu provadu komete krime hasoru lezada, tanba ne'e husu ba Tribunál aplika pena multa tuir arguidu nia kapasidade ekonomi no selu mós kustu judisial.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál no ho inisiativa rasik diak malu ona ho lezada. Tanba ne'e husu ba Tribunál aplika pena multa ne'ebé minimu ba arguidu.

Desizaun

Depoisde avalia faktus hotu, Tribunál konklui katak arguidu provadu komete krime hasoru lezada no kondena arguidu ho pena multa US\$120.00 no sei selu US\$2.00 kada lora durante lora 60. Tribunál mós fiksa pena alternativa durante lora 40 prizaun, wainhira arguidu la kumpri pena multa ne'e no selu mós kustu judisial US\$20.00.

22. Krime ofensa ba integridade fizika simples ho natureza violénsia doméstika

Nú. Prosesu	: 0036/16. BCBCV
Kompozisaun Tribunál	: Singular
Juis	: Dr. Antonio Fonseca
Prokuradór	: Dra. Bemvinda do Rosario
Defeza	: Dr. Jose M. Guterres
Tipu pena	: Pena prizaun fulan 8 suspende ba tinan 1

Iha 28 Marsu 2017, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebe envolve arguidu AX hasoru nia feen, iha Distritu Baucau.

Akuzasaun husi Prokuradór

Prokuradór akuza katak, iha 8 Juñu 2016, iha tuku 06.00 dadersan, arguidu kaer lezada nia kanuruk no riba lezada ba rai no rezulta lezada nia kidan moras no bubu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklarata katak foin primeira-vez mai mai hatan iha Tribunál, diak malu ona ho lezada, arrepende ona nia hahalok. Iha parte seluk lazada kontinua reforsa faktu sira iha akuzasaun.

Alegasaun finál

Prokuradór haktuir katak arguidu provadu komete krime hasoru lezada, tanba ne'e husu ba Tribunál aplika pena prizaun tinan 2 suspende ba tinan 2.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekua ba arguidu.

Desizaun

Tribunál konklui prosesu ne'e no kondena arguidu ho pena prizaun fulan 8 suspende ba tinan 1 ho regra ba konduta apresenta an periódikamente iha Tribunál kada fulan dala 1 durante fulan 8 no selu mós kustu judisial US\$20.00.

23. Krime danu simples

Nú. Prosesu : 0001/16. VQOSU
Kompozisaun Tribunál : Singular
Juis : Dra. Ercilia de Jesus
Prokuradór : Dr. Domingos Goveia Barreto
Defeza : Dr. Juvinal Yanes
Tipu pena : Pena multa US\$150.00

Iha 29 Marsu 2017, Tribunál Distritál Baucau prezide julgamentu leitura sentensa ba krime danu simples ne'ebé envolve arguidu JHX hasoru Suku Wagia, iha Sub-distritu Ossu, Distritu Viqueque.

Akuzasaun husi Prokuradór

Prokuradór akuza katak iha 1 Janeiru 2016, iha tuku 2.00 madrugada, iha festa Tinan-Foun, iha Sede Suku Wagia, arguidu dezliga tiha fiu ba gravador. Hafoin ida-ne'e ema tenta atu lori fila arguidu ba uma maibé arguidu tama fali ba festa laran baku rahun kuluna 2, ampolas 1, kadeira masa 2, no halo kuak plafon 2 Sasan sira ne'ebé arguidu estraga pertense ba Sede Suku Wagia nian no hamosu prejuizu ba suku hamutuk US\$500.00. Depoisde ne'e Sr. Carlos Monteiro nu'udar comunidade Suku Wagia hakilar dehan futu tiha arguidu, derepente ema deskuñesidu baku kedas Sr. Carlos Monteiro, no arguidu kontinua diskute malu no tuku dala 1 iha Sr. Domingos Braco (*PNTL OPS iha suku Wagia*), nia hirus-matan no basa tuku 1 iha sekretaris suku nia hirus matan.

Prokuradór akuza arguidu kontra artigu 260 Kódigu Penál kona-ba krime danu ho violénsia ho nia moldura penal tinan 4 too tinan 12.

Produsaun ba prova

Iha julgamentu, arguidu deklara katak iha akontesementu ne'e arguidu ho kondisaun lanu. Iha 5 Janeiru 2016 arguidu deklara iha Polisia Eskuadra Ossu katak hakarak selu fila fali sasan ne'ebé nia estraga maibé autoridade suku mak lakohi.

Testemuña MPB nu'udar sekretaris Suku Wagia depoimenta katak momentu testemuña to'o iha fatin akontesementu sasan estraga hotu ona no testemuña haree arguidu ho Sr. Carlos Monteiro diskute malu no testemuña ba koalia netik.

Testemuña DXG nu'udar Xefe Aldeia Manulai depoimenta katak haree arguidu taka muzika no baku rahun kuluna 2, kadeira masa 1, ampolas 1 no halo kuak plafon 2.

Testemuña DB nu'udar Membru PNTL OPS iha suku Wagia depoimenta katak, testemuña simu telefone hosi testemuña DXG (xefe aldeia), katak ema baku malu iha festa laran no wainhira testemuña to'o haree katak sasan estraga hotu ona. Testemuña hakbesik ba arguidu no kaer arguidu nia liman no arguidu dulas nia-an, nune'e arguidu nia liman kona iha testemuña nia hirus-matan. Maibé testemuña la sente ne'e tuku ka basa tanba momentu ne'e testemuña la sente moras.

Alegasaun finál

Prokuradór haktuir katak bazeia ba akuzasaun, arguidu estraga sasan no ofende testemuña sira seluk nia isin, testemuña DXG haree ho matan arguidu estraga sasan no sasan sira ne'e utilija ba públiku. Arguidu nia hahalok priense rekezitus ba krime danu ho violénsi. Tanba ne'e husu ba Tribunál aplika pena minimu ba arguidu.

Enkuantu Defeza haktuir katak arguidu konfesa estraga uluk sasan, tanba ema barak la hatene baku malu ho se tanba iha akontesementu ne'e arguidu ho kondisaun lanu. Arguidu mós iha vontade hakarak rekopera fali sasan ne'ebé arguidu estraga maibé autoridade suku mak lakohi. Tanba ne'e husu ba Tribunál halo alterasaun juridíka husi artigu 260 KP ba fali artigu 258 KP no fo pena ne'ebé kma'an ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál halo alterasaun juridíka husi artigu 260 KP ba fali artigu 258 KP no konklui prosesu ne'e no kondena arguidu ho pena multa US\$150.00 no sei selu US\$1.00 kada loron durante loron 150. Tribunál fiksa mós pena alternativa durante loron 100 prizaun, wainhira arguidu la kumpri pena multa ne'e no selu mós kustu judisial US\$20.00.

24. Krime ofensa ba integridade fizika simples ho natureza violénsia doméstika

Nú. Prosesu : 0054/16. VCBCV
Kompozisaun Tribunál : Singulár
Juis : Da. Jose Escurial
Prokuradór : Dra. Bemvinda do Rosario
Defeza : Dr. Grigorio de Lima
Tipu pena : Pena multa US\$ 15.00

Iha 29 Marsu 2017 Tribunál Distritál Baucau prezide julgamentu ba krime ofensa ba integridade fizika simples ho natureza violénsia doméstika ne'ebé envolve arguida EAX hasoru nia laen, iha Distritu Baucau.

Akuzasaun husi Prokuradór

Prokuradór akuza katak iha 26 Jullu 2016, iha tuku 18.00 lokraik, arguida lori tudik sona lezadu nia liman parte loos rejulta kanek no ran sai barak no lezadu konsege ba halo tratamentu iha Ôspital Referral Baucau. Antes problema ne'e akontese arguida no lezadu separa ona.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguida nega faktus hotu iha akuzasaun. Iha parte seluk lezadu kontinua konfirma faktus hotu iha akuzasaun, lezadu mós deklar katak lezadu ho arguida separa ona iha tinan 2015. Iha akontesementu ne'e lazadu fila hosi ospital haree arguida hamrik hela iha veranda, tanba ne'e lezadu tama husi odamatan kotuk no arguida hakbesik ba lezadu derepente lezadu nia liman kanek no lakleur polisia too iha fatin akontesementu no lori arguida no lezadu ba Eskuadra Polisia Baucau Vila.

Alegasaun finál

Prokuradór konsidera arguida komete duni krime hasoru lezadu no husu ba Tribunál atu kondena arguida ho pena prizaun maibé nia ezekusaun suspensaun.

Enkuantu Defeza deklar katak kanek tiha mak lezadu sente maibé kanek ne'e kauza husi saida lezadu la hatene, lezadu mak hanoin deit katak kanek ne'e tudik nia fatin. Tanba ne'e husu ba Tribunál aplika pena ne'ebé adekuadu ba arguida.

Desizaun

Tribunál konklui prosesu ne'e no kondena arguida ho pena multa US\$15.00 no sei selu 0.50 sentavus kada loron durante loron 30. Tribunál mós fiksa pena alternativa durante loron 20 prizaun, wainhira arguida la kumpri pena multa ne'e.

25. Krime maus tratus ba kónjuje

Nú. Prosesu : 0032/15. BCBCV
Kompozisaun Tribunál : Kolektivu
Juis : Dr. Hugo da Cruz Pui
Dr. Antonio Fonseca
Dr. Jose Quintão
Ministériu Públiku : Dr. Luis H. Rangel da Cruz
Defeza : Dr. Antonio Fernandes
Tipu desizaun : Pena prizaun 2 fulan 3 suspende ba tinan 2 fulan 3

Iha 29 Marsu 2017, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu ABF hasoru nia feen iha Distritu Baucau.

Akuzasaun husi Prokuradór

Prokuradór akuza katak iha 20 Maiu 2015, iha tuku 18.00 lokraik, arguidu tuku dala 3 iha lezada nia kanuruk no tebe dala 1 lezada nia kanuruk.

Iha tinan 2014 sein motivu ne'ebé klaru arguidu tuku dala barak iha lezada nia ulun. Iha tinan 2013, arguidu basa dala 2 iha lezada nia hasan karuk no tuku dala 1 iha lezada nia kabas. Antes ida-ne'e mós, maisumenus iha tinan 2012, arguidu basa dala 1 iha lezada nia hasan parte karuk.

Prokuradór akuza arguidu kontra artigu 154 Kódigu Penál kona-ba krime maus tratus ba konjuje ho nia moldura penal tinan 2 to'o tinan 6 no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu deklara iha faktus balun loos no balun la loos arguidu deklara katak iha akontesementu 20 Maiu arguidu la tebe lezada nia kanuruk, maibe tuku deit no akontesementu iha 2014, 2013 no 2012, arguidu la baku lazada no sira diskute malu deit. Arguidu mós deklara katak depoisde akontesementu 20 Maiu ne'e diak malu kedas ho lezada, arrepende ona nia hahalok, foin primeira-vez mai hatan iha Tribunál. Iha parte seluk lezada kontinua konfirma faktus sira iha akuzasaun.

Iha julgamentu, arguidu deklara iha faktus balun loos no balun la loos; arguidu deklara katak iha akontesementu 20 Maiu arguidu la tebe lezada nia kanuruk, maibe tuku deit. Arguidu mós rekoñese faktus sira iha 2014, 2013 no 2012 maibe arguidu dehan katak depoisde akontesementu diak malu kedas ho lezada. Arguidu hatutan katak nia arepende ona ninia hahalok, no foin primeira-vez mai hatan iha Tribunál. Iha parte seluk lezada kontinua konfirma faktus sira iha akuzasaun.

Alegasaun finál

Prokuradór konsidera arguidu komete duni krime hasoru lezada no husu ba Tribunál atu kondena arguidu ho pena prizaun tinan 2 suspende ba tinan 3. Prokurador afirma katak pena ne'e nu'udar meu ida atu prevene arguidu la repete ninia hahalok ne'e iha futuru.

Enkuantu Defeza haktuir katak arguidu konfesa deit faktus ne'ebé nia komete, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé kma'an ba arguidu.

Desizaun

Depoizde avalia faktus hotu Tribunál konklui katak arguidu provadu komete krime hasoru lazada no Tribunál kondena arguidu ho pena prizaun tinan 2 fulan 3 suspende ba tinan 2 fulan 3.

26. Krime ofensa ba integridade fizika simples ho natureza violénsia doméstika

Nú. Prosesu	: 0018/16. BCLGA
Kompozisaun Tribunál	: Singular
Juis	: Dr. Antonio Fonseca
Prokuradór	: Dra. Bemvinda do Rosario
Defeza	: Dr. Sidonio M. Sarmiento(Defensória Pública)
Tipu pena	: Pena prizaun fulan 10 suspende ba tinan 1

Iha 30 Marsu 2017 Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdCB hasoru nia feen, iha Distritu Baucau.

Akuzasaun husi Prokuradór

Prokuradór akuza katak iha 25 Agostu 2016, tuku 15.00 lokraik, arguidu basa dala 2 iha lezada niaibun no rezulta kanek no ran. Aleinde ne'e, arguidu uza ulun fai ba lezada nia matan parte loos rezulta moras no bubu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal too tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklarata katak foin primeira-vez mai hatan iha Tribunál no arepende ona ba nia hahalok. Iha parte seluk lezada kontinua konfirma faktus sira iha akuzasaun.

Alegasaun finál

Prokuradór konsidera arguidu komete duni krime hasoru lezada no husu ba Tribunál kondena arguidu ho pena prizaun tinan 2 suspende ba tinan 2. Prokurador afirma katak pena ne'e nu'udar meu ida atu prevene arguidu la repete ninia hahalok ne'e iha futuru.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé kama'an ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál konklui katak arguidu provadu komete krime hasoru lezada no kondena arguidu ho pena prizaun fulan 10 suspende ba tinan 1 no regra ba konduta apresenta an periódiku kada fulan dala 1 durante fulan 10 no selu mós kustu judisial US\$10.00.

Atu hetan informasaun kompleitu bele kontaktu ba:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl